

Úthlutunarreglur Sjúkrasjóðs BHM

1. janúar 2022

1. INNGANGUR:

Um rétt sjóðfélaga og skipulag sjóðsins gildir skipulagsskrá Sjúkrasjóðs BHM sem samþykkt var á aðalfundi BHM 18. maí 2017. Samkvæmt 7. gr. hennar setur sjóðsstjórn nánari úthlutunarreglur og tekur við sérstakur aðstæður matskennda ákvörðun um úthlutun úr sjóðnum. Samkv. 2. gr. skipulagsskrárinnar kemur fram að sjóðnum skal varið til þess að styrkja sjóðfélaga með fé og koma þannig m.a. til móts við tekjutap vegna ólaunaðrar fjarveru sjóðfélaga frá vinnu vegna veikinda sjóðfélaga eða nákominna eða annarra persónulegra aðstæðna; útgjöld vegna andláts sjóðfélaga; útgjöld sjóðfélaga vegna ýmiss konar heilbrigðisþjónustu og forvarna. Stöðlun reglna má þó ekki koma í veg fyrir að sjóðsstjórn sé við sérstakur aðstæður unnt að taka matskenndar ákvarðanir með hliðsjón af persónulegum aðstæðum sjóðfélaga.

2. SJÓÐSAÐILD:

Almenn réttindi. Réttur sjóðfélaga til úthlutunar úr sjóðnum er háður því að greitt hafi verið sjúkrasjóðsframlag vegna sjóðfélaga samtals í 6 mánuði og þar af 3 mánuði samfellt áður en tekjutap eða útgjöld, sem veita rétt til styrks úr sjóðnum, áttu sér stað. Þó öðlast sá rétt strax sem öðlast hefur rétt til greiðslu úr Styrktarsjóði BHM er hann verður sjóðfélagi í Sjúkrasjóði BHM. Sama gildir um þá sem öðlast hafa rétt úr sjúkrasjóðum annarra stéttarfélaganna sem veita fyrrum sjóðfélögum úr Sjúkrasjóði BHM sams konar rétt.

- a. **Í fæðingarorlofi.** Sjóðfélagar sem fara í fæðingarorlof og velja að greiða stéttarfélagsgjald meðan á því stendur halda fullum réttindum.
- b. **Í veikindum.** Sjóðfélagi sem hefur fullnýtt rétt sinn til sjúkradagpeninga nýtur áfram annarra réttinda í sjóðnum í allt að eitt ár stofni hann ekki til réttinda annars staðar.
- c. **Atvinnulausir.** Atvinnulausir halda réttindum í sjóðnum í eitt ár í beinu framhaldi af fullri sjóðsaðild. Þetta gildir ef bótatímabil hefst eða útgjöld eiga sér stað innan árs frá upphafi atvinnuleysis, svo fremi að frá upphafi sé greitt félagsgjald af atvinnuleysisbótum til viðkomandi stéttarfélaganna.

Stéttarfélagum er heimilt að lengja þetta tímabil svo lengi sem sjóðfélagi þiggur greiðslur atvinnuleysisbóta frá Atvinnuleysisstryggingasjóði, enda bera þau ábyrgð á greiðslu 1,0% iðgjalds af atvinnuleysisbótum til sjóðsins frá upphafi atvinnuleysitímabils. Stéttarfélög skulu tilkynna sjóðnum um að þau ætli sér að nýta þessa heimild og í hve langan tíma.

Hafi atvinnulaus einstaklingur ekki sjóðsaðild getur hann fengið aðild og öðlast réttindi í sjóðnum sé greitt félagsgjald af atvinnuleysisbótum til viðkomandi stéttarfélaganna sem ber ábyrgð á greiðslu 1,0% iðgjalds af atvinnuleysisbótum til sjóðsins. Ávinnsla réttinda er þá með sama hætti og ávinnsla annarra samkvæmt reglum sjóðsins. Stéttarfélög skulu tilkynna sjóðnum um að þau ætli sér að nýta þessa heimild.

- d. **Aðild í launalausum leyfi.** Sjóðfélagar halda réttindum í launalausum leyfi í allt að sex mánuði. Styrkréttur miðast þó við að viðkomandi hafi hafið störf að nýju. Ekki eru greiddir sjúkradagpeningar vegna veikinda í launalausum leyfi.
- e. **Aðild við starfslok.** Sjóðfélagar halda réttindum í 12 mánuði eftir að þeir láta af störfum og fara á lífeyri. Sjúkradagpeningar eru þó ekki greiddar lengur en í þrjú mánuði.
- f. **Heimildarákvæði vegna sjóðfélaga sem flytjast milli sjúkrasjóða.** Stéttarfélagum er heimilt að greiða eingreiðslu í Sjúkrasjóði BHM vegna félagsmanna sinna, sem hafa verið á vinnumarkaði síðastliðna 6 mánuði og eiga rétt í öðrum sjúkrasjóði, í þeim tilgangi að tryggja félagsmanni/sjóðfélagi rétt til úthlutunar sjúkradagpeninga frá upphafi sjóðsaðilda.

Skal stéttarfélag greiða Sjúkrasjóði BHM eingreiðslu sem nemur 1% af heildarlaunum viðkomandi félagsmanns síðustu 6 mánuði í launlausu starfi. Öðlast félagsmaður/sjóðfélagi þá rétt til greiðslu sjúkradagpeninga skv. gildandi reglum sjóðsins á hverjum tíma.

Sjóðfélagi öðlast rétt til greiðslu annarra styrkja eftir að iðgjald hefur verið greitt í sjóðinn í 6 mánuði. Stéttarfélög skulu tilkynna sjóðnum um að þau ætli sér að nýta þessa heimild.

3. **UMSÓKNIR OG REGLUR:**

- a. **Umsóknir.** Sækja þarf um styrk til sjóðsins á rafrænu umsóknareyðublaði á þjónustugátt BHM "[Mínum síðum](#)". Umsóknir þurfa að berast sjóðnum ásamt fylgigögnum fyrir 15. hvers mánaðar til að öruggt sé að umsókn sé afgreidd í sama mánuði.
- b. **Gögn.** Gögn skulu send inn rafrænt með umsókn. Nauðsynleg gögn verða að liggja fyrir til að sjóðfélagi geti fengið greitt úr sjóðnum. Þessi gögn eru sundurliðaðir reikningar með nafni umsækjanda sem sannanlega eru greiddir af sjóðfélagi sjálfum. Heimilt er að víkja frá þessu ákvæði ef um samskattaðan aðila er að ræða. Á reikningunum þarf að vera útgáfudagur reiknings, áritun/stimpill/merki þess er gefur reikninginn út með upplýsingum um nafn, starfsheiti, kennitölu og heimilisfang eða símanúmer. Upplýsingar um þiggjanda meðferðar, sundurliðun og tegund meðferðar ásamt dagsetningu meðferða eða kaupa á vöru eða þjónustu sem aðeins sjóðfélagi hefur nýtt sér skal koma fram á reikningi. Sjóðurinn áskilur sér rétt til að óska eftir frumriti reiknings sem áður hefur verið sendur til sjóðsins, áður en útborgun á sér stað.
- c. **Afgreiðsla umsókna.** Starfsmenn sjóðsins afgreiða umsóknir samkvæmt úthlutunarreglum þessum í samræmi við ákvarðanir sjóðstjórnar. Sjóðsstjórn fundar a.m.k. einu sinni í mánuði. Sjúkradagpeningar eru afgreiddir einu sinni í lok mánaðar og styrkir eru afgreiddir a.m.k. einu sinni í hverjum mánuði. Sjóðfélagi getur ávallt vísað afgreiðslu á máli sínu til stjórnar Sjúkrasjóðs BHM.
- d. **Gögn vegna sjúkradagpeninga og dánarbóta.** Umsóknum um sjúkradagpeninga og dánarbætur skal skila undirrituðum, annað hvort skönnuðum í gegnum *Mínar síður* eða til skrifstofu sjóðsins, ásamt vottorðum læknis. Umsóknareyðublað eru aðgengileg á vefsíðu [sjóðsins](#).
- e. **Upphæð styrks – staðgreiðsla skatta.** Ekki eru greiddir hærri styrkir en sem nemur framlögðum reikningum. Staðgreiðsla skatta er tekin af öllum styrkfjárhæðum að frátöldum líkamsræktarstyrk og útfarastyrk. Ef iðgjöld sjóðfélaga eru lægri en 3.000 kr. á mánuði fær sjóðfélagi aðeins greiddan hálfan styrk frá sjóðnum. Reiknað er út meðaltal inngreiðslna iðgjalda síðustu þriggja mánaða, talið frá þeim degi sem umsókn berst til sjóðsins. Ef reiknað meðaltal er 3.000 kr. eða hærra þá á viðkomandi rétt á fullum styrk. Ef reiknað meðaltal inngreiðslna iðgjalda síðustu þriggja mánaða, talið frá umsóknardegi, er 2.999 kr. eða lægra þá á viðkomandi rétt á hálfum styrk.
- f. **Réttur til styrkja fellur niður ef:**
 - a) Réttur til almennra styrkja úr sjóðnum, sbr. gr. 5-9, 10.b., og 12, fellur niður sé ekki sótt um styrk innan 12 mánaða frá því að til útgjalda var stofnað.
 - b) Réttur til dánarbóta fellur niður að liðnum 24 mánuðum frá dánardegi, sbr. gr. 11.a-c
 - c) Réttur til fæðingarstyrks fellur niður að liðnum 24 mánuðum frá fæðingardegi barns eða því sem fram kemur í gr. 10.c.
 - d) Réttur til ættleiðingarstyrks fellur niður að liðnum 24 mánuðum frá því að stofnað var til útgjalda, sbr. gr. 10.a.
 - e) Sjúkradagpeningar eru að hámarki greiddir í þrjá almanaks mánuði afturvirkir miðað við umsóknarmánuð, sbr. a-liðar 4. gr.
 - f) Réttur til greiðslna úr sjóðnum fellur niður að liðnum 3 mánuðum frá því síðast var greitt iðgjald til sjóðsins. Sé styrks ekki vitjað innan 9 mánaða frá ákvörðun sjóðstjórnar eða starfsmanns sjóðsins fellur umsókn hans niður.
- g. **Villandi- eða rangar upplýsingar.** Sá sem gefur rangar eða villandi upplýsingar eða lætur hjá líða að veita nauðsynlegar upplýsingar, missir rétt til bóta í allt að tvö ár. Í tilvikum þar sem um er að ræða ofgreiðslu vegna rangra upplýsinga er sjóðsstjórn heimilt að endurkrefja bótapega um alla bótafjárhæðina auk dráttarvaxta. Sjóðstjórn er heimilt að draga frá ofgreiddar bætur við næstu úthlutunir til sjóðfélaga.
- h. **Sjúkratryggingar Íslands.** Að jafnaði er ekki er veittur styrkur vegna kostnaðar sem mætt er af greiðsluþáttökukerfi Sjúkratrygginga Íslands.

4. **SJÚKRADAGPENINGAR**

Réttur til sjúkradagpeninga vegna sannanlegs tímabundins tekjutaps sjóðfélaga sökum óvinnufærni vegna veikinda eða slysa, þ.m.t. veikinda á meðgöngu er sem hér segir:

- a) **Sjúkra- og slysadagpeningar** greiðast í allt að 4 mánuði enda séu launagreiðslur í veikinda- eða slysaforföllum hættar eða skertar. Samanlagðar greiðslur sjóðsins skulu þó aldrei nema hærri fjárhæð en sem nemur tekjutapi sjóðfélaga. Sjúkradagpeningar eru að hámarki greiddir í þrjá almanaksmánuði afturvirkir miðað við umsóknarmánuð. Þegar um samfelld veikindi er að ræða er stjórn Sjúkrasjóðs BHM heimilt að fresta þegar samþykktari umsókn, að beiðni sjóðfélaga, eftir að taka sjúkradagpeninga hefst vegna gildra ástæðna s.s. töku fæðingarorlofs eða vinnu að læknisráði.
- b) **Upphæð sjúkradagpeninga** skal nema 80% af grunni inngreiðslna sjóðfélaga í sjóðinn síðustu 4 mánuði áður en greiðslur féllu niður þó að hámarki 713.000 kr. á mánuði. Sjúkrasjóði BHM er heimilt að óska frekari gagna, s.s. launaseðla og staðgreiðsluskrá frá Skattinum til að sannreyna réttmæti fyrirliggjandi gagna.

Sé um að ræða uppgjörsgreiðslur á tímabilinu, s.s. á orlofi vegna uppsagnar eða starfsloka sem gerðar eru upp í einu lagi, þá er litið svo á að sé að ræða framtíðargreiðslur fyrir næstu mánuði og hafa þær því ekki áhrif á útreikning upphæðar sjúkradagpeninga.

Ávinnsluréttur sjúkradagpeningsmánaðar er miðaður við fjölda inngreiðslna s.l. 4 mánuði fram að þeim degi er réttur til launa í veikindum telst fullnýttur hjá vinnuveitanda eða viðkomandi fellur af launaskrá (t.d. vegna uppsagnar). Hafi verið greitt í sjóðinn í færri en 4 mánuði, miðast réttur til sjúkradagpeninga við fjölda þeirra mánaða sem greiddir hafa verið. Fjöldi inngreiðslna í sjóðinn má þó aldrei vera færri en 3 mánuðir samfellt sbr. gr. 2.a.

Allar skattskyldar greiðslur frá öðrum aðilum umfram 20% af grunni inngreiðslna síðustu 4 mánuði, koma að fullu til frádráttar sjúkradagpeninga frá sjóðnum.

Sjóðurinn greiðir ekki sjúkradagpeninga í þeim tilvikum þar sem sjóðfélagi nýtur greiðslna vegna tekjutaps fyrir sama slys/veikindatímabil frá öðrum, t.d. greiðslur úr slysatryggingu launafólks og greiðslur vegna slysa af völdum vélknúinna ökutækja. Komi til þess að slíkar greiðslur séu lægri en fjárhæð útreiknaðra sjúkradagpeninga frá SBHM er sjóðnum heimilt að greiða mismuninn.

- c) **Veikindi barns sjóðfélaga.** Sjóðurinn greiðir sjúkradagpeninga í allt að 3 mánuði vegna fjarveru frá vinnu (tekjutaps) vegna alvarlegra langtímaveikinda barns. Sjóðstjórn metur hvert einstakt tilvik fyrir sig með hliðsjón af öllum aðstæðum, þ.m.t. annarra styrkja. Miðað skal við að aðrar greiðslur vegna veikinda barna séu fullnýttar t.d. hjá atvinnurekanda, Fæðingarorlofssjóði o.s.frv. eða að umsókn um frekari greiðslur hafi verið hafnað. Jafnframt skal skila inn niðurstöðu umsóknar um umönnunarbætur.
- d) **Veikindi maka sjóðfélaga.** Sjóðurinn greiðir sjúkradagpeninga í allt að 2 mánuði vegna fjarveru frá vinnu vegna alvarlegra langtímaveikinda maka eða sambúðarmaka. Þó er ekki greitt fyrir fyrstu 10 dagana í veikindum.
- e) **Veikindi á meðgöngu.** Verðandi mæður sem þurfa að leggja niður störf á meðgöngu, vegna heilsufarsástæðna sem tengjast meðgöngunni, skulu hafa kannað rétt sinn til framlengingar á fæðingarorlofi frá Fæðingarorlofssjóði áður en réttur til sjúkradagpeninga kemur til greina. Sjúkrasjóði BHM er þá heimilt að kalla eftir að sjóðfélagi framvísi staðfestingu frá Fæðingarorlofssjóði um réttindastöðu þar.

Sé fyrrgreindur réttur til framlengingar á fæðingarorlofi til staðar eiga verðandi mæður rétt á greiðslu sjúkradagpeninga til að vega á móti tekjuskerðingu fram að fæðingardegi barns. Upphæð sjúkradagpeninga miðast við greiðsluáætlun frá Fæðingarorlofssjóði. Viðkomandi sjóðfélaga ber að fullnýta rétt sinn hjá Fæðingarorlofssjóði.

- f) **Veikindi og eða slys sjóðfélaga í fæðingarorlofi.** Þegar því er ekki viðkomið að sjóðfélagi geti hugsað um barn sitt vegna veikinda og/eða slyss í fæðingarorlofi greiðir sjóðurinn allt að einn og hálfan mánuð á meðan fæðingarorlofi stendur. Þó er ekki greitt fyrir fyrstu 10 dagana í veikindum. Forsenda er að umsækjandi segi sig frá greiðslum frá fæðingarorlofssjóði og að veikindi/slys veiti ekki rétt til lengingar fæðingarorlofs eða að umsókn um lengingu á fæðingarorlofi hafi verið hafnað.

- g) **Veikindi sjálfstætt starfandi.** Sjóðfélagi sem er sjálfstætt starfandi hefur rétt til greiðslu sjúkradagpeninga sem um launþega væri að ræða. Biðtími til bótaréttar vegna sjálfstætt starfandi félagsmanna skal vera 2 mánuðir vegna eigin veikinda. Sjálfstætt starfandi telst sá vera sem starfar við eigin atvinnurekstur eða sjálfstæða starfsemi eða starfar á vegum sameignarfélags, einkahlutafélags eða hlutafélags þar sem hann hefur ráðandi stöðu vegna eignar- eða stjórnumunaraðildar.
- h) **Sjúkradagpeningavottorð** Skila skal sjúkradagpeningavottorði frá lækni með umsókn um sjúkradagpeninga. Að jafnaði skal skila inn nýju sjúkradagpeningavottorði á tveggja mánaða fresti. Kostnaður vegna vottorða er endurgreiddur gegn framvísun kvittunar.
- i) **Trúnaðarlæknir.** Ef nauðsyn ber til er stjórn sjóðsins heimilt að setja það skilyrði fyrir greiðslu sjúkradagpeninga úr sjóðnum að umsækjandi heimili trúnaðarlækni sjóðsins að sannreyna réttmæti framlagðra læknisvottorða og eftir atvikum framkvæma lækni skoðun.
- j) **Tæming réttar.** Réttur til nýs sjúkradagpeningatímabils stofnast aftur þegar greitt hefur verið vegna sjóðfélaga í 6 mánuði eftir að síðasta sjúkradagpeningatímabili lauk. Hverjum sjóðfélagi er að hámarki greidd 2 sjúkradagpeningatímabil á hverju 10 ára tímabili.

STYRKIR SJÚKRASJÓÐS BHM

Eftirfarandi styrkir eru eingöngu fyrir sjóðfélaga. Styrkir eru ekki greiddir fyrir meðferð eða þjónustu vegna barns/barna, maka eða annarra. Undanskilin er grein 12. b)

5. HEYRNARTÆKI

Greitt er 80% af útlögðum kostnaði til kaupa á heyrnartækjum á hverjum 36 mánuðum að hámarki kr. 145.000.

6. HEILSURÆKT:

Veittur er styrkur vegna íþróttaiðkunar. Greitt er að hámarki kr. 25.000 á hverju 12 mánaða tímabili. Kaup á tækjum og/eða öðrum útbúnaði til heilsuræktar er ekki styrkhæfur hjá Sjúkrasjóði BHM.

7. FORVARNIR:

Veittur er styrkur vegna forvarna að hámarki 20.000 kr. á hverju 12 mánaða tímabili:

- Skimun** vegna brjóstakrabbameins og/eða leghálskrabbameins (greitt fyrir leghálsstrok) hjá heilsugæslu eða kvensjúkdómalækni.
- Krabbameinsskimun** í ristli og/eða blöðruhálsi.
- Framhaldsrannsókn** vegna liða a. og b. fellur hér undir.
- Áhættumat** vegna hjartasjúkdóma.

8. STYRKIR VEGNA MEÐFERÐA Á LÍKAMA OG SÁL:

Endurgreiðsla vegna útlagðs kostnaðar er að hámarki kr. 75.000 á hverju 12 mánaða tímabili fyrir einstaklingsmeðferð/hópmeðferð hjá faglega viðurkenndum aðila sem hefur löggildingu viðkomandi starfsstéttar frá landlækni og á fagsviði viðkomandi, t.a.m. sjúkraþjálfara, iðjuþjálfara, sjúkranuddara, osteopata, sálfræðingi, hjúkrunarfræðingi, félagsráðgjafa, næringarráðgjafa, og kiropraktor. Ekki er veittur styrkur vegna læknikostnaðar. Dvöl á viðurkenndri heilsustofnun, svo sem NLFÍ, er styrkhæf undir þessum lið. Stjórn áskilur sér rétt til að óska eftir læknisvottorði eða upplýsingum um meðferðaraðila. Fræðslunámskeið eru ekki styrkhæf. Meðferð þarf að fara fram hérlandis. Styrkur verður þó aldrei hærri en útlagður kostnaður.

9. HJÁLP VEGNA STARFSTENGDRÁ ÁFALLA EÐA ÓVÆNTRA STARFSLOKA:

Sjóðurinn styrkir meðferð hjá faglega viðurkenndum aðila, sem hefur starfsleyfi frá Landlækni, til að vinna úr áfalli í starfi eða í kjölfar óvæntra starfsloka samkvæmt beiðni trúnaðarmanns/stéttarfélags fyrir að hámarki 55.000 kr. á hverju 36 mánaða tímabili.

10. ÆTTLEIÐING, TÆKNIFRJÓVGUN OG FÆÐINGARSTYRKUR

a. Ættleiðing

Veittur er styrkur að hámarki kr. 170.000 vegna útgjalda við að sækja barn til ættleiðingar til hvers sjóðfélaga. Sækja þarf um styrk innan 24 mánaða frá því að til útgjalda var stofnað. Styrkur verður þó aldrei hærri en útlagður kostnaður.

b. Tæknifriðgun

Greiddur er 125.000 kr. hámarksstyrkur vegna tækni-, smásjár- eða glasafriðgunarmeðferða á 24 mánaða tímabili. Styrkur verður þó aldrei hærri en útlagður kostnaður.

c. Fæðingarstyrkur

Veittur er styrkur að hámarki kr. 100.000 til hvers sjóðfélaga vegna fæðingar barns. Þar að auki er veittur sami styrkur vegna ættleiðingar barns yngri en 18 ára eða þegar barni yngri en 18 ára er komið fyrir í varanlegt fóstur. Einnig er veittur styrkur vegna andvana fæðingar barns, eftir 22. viku meðgöngu eða fósturláts eftir 18. viku meðgöngu. Sækja þarf um innan 24 mánaða frá fæðingu eða ættleiðingu barns. Fæðingarstyrkur er veittur til foreldris gegn framvísun fæðingarvottorðs eða vottorði um skráningu barns í þjóðskrá.

11. DÁNARBÆTUR

a. Dánarbætur sjóðfélaga.

Greiddar eru dánarbætur að upphæð kr. 350.000 vegna fráfalls sjóðfélaga. Réttur til greiðslu dánarbóta fyrnist ef ekki er sótt um þær innan 24 mánaða frá dánardegi. Einnig eru greiddar dánarbætur vegna fyrrum sjóðfélaga sem fellur frá innan 2ja ára frá starfslokum/lífeyristöku.

b. Dánarbætur vegna fráfalls barns sjóðfélaga.

Greiddar eru dánarbætur að upphæð kr. 350.000 vegna andláts barns sjóðfélaga yngri en 18 ára. Dánarbætur eiga einnig við þegar um er að ræða andvana fæðingu barns, eftir 22. viku meðgöngu, eða fósturláts eftir 18. viku meðgöngu. Réttur til greiðslu dánarbóta fyrnist ef ekki er sótt um þær innan 24 mánaða frá dánardegi. Bætur eru greiddar til lögerfingja. Ef báðir foreldrar eru sjóðfélagar greiðast bætur einungis til annars sjóðfélaga.

c. Tímabundið framfærslutap maka/sambúðarmaka.

Til að bæta tímabundið framfærslutap maka/sambúðarmaka eru greidd að jafngildi ein mánaðarlaun hins látna m.v. meðal innborgun síðustu 4 mánaða að hámarki kr. 713.000. Ef hinn látni var með barn/börn á framfæri undir 18 ára aldri greiðast hálf mánaðarlaun til viðbótar. Hámarksgreiðsla vegna þessara greinar getur mest orðið kr. 1.069.500.

12. HEIMILDARÁKVÆÐI VEGNA ANNARS HEILBRIGÐISKOSTNAÐAR:

Sjóðsstjórn metur hverju sinni hvort umsókn falli undir heimildarákvæðið.

Við sérstakar aðstæður, s.s. óvænt mikil útgjöld og/eða fjárhagslegri erfiðleika umfram 150.000 kr. sem rekja má til alvarlegra veikinda eða slysa hans sjálfs, barna hans eða maka getur sjóðstjórn veitt styrk allt að 150.000 kr. Greitt er 30% af styrkhæfum kostnaði.

Ekki er greitt vegna lyfjakostnaðar eða annars heilbrigðiskostnaðar sem Sjúkratryggingar Íslands taka þátt í. Ekki er greiddur kostnaður vegna fegrunaraðgerða eða umsókna sem falla undir aðra liði þessara reglna.

13. GILDISTAKA:

Úthlutunarreglum þessum var síðast breytt á stjórnarfundum Sjúkrasjóðs BHM þann 01. desember 2021 og gilda þær frá og með 01. janúar 2022. Úthlutunarreglur og breytingar á þeim eru birtar á vefsíðu BHM.

--

Undirritunarsíða

Hjalti Einarsson

Marianna Huguín Helgadóttir

Júlíana Guðmundsdóttir

Tryggvi Guðjón Ingason

Hanna Dóra Hólm Másdóttir